



Trud i zalaganje u blagoslovljenom vremenu (Medina)

Hatib: dr. Salah ibn Muhammed el-Budejr

19. ramazan 1445. po Hidžri / 29. mart 2024.

Hvala Allahu na blagodatima kojima nas obasipa i koje nam uvećava.

Svjedočim da nema boga osim Allaha, Jedinog, Koji nema druga, i svjedočim da je naš vjerovjesnik i prvak Muhammed, Njegov rob i poslanik, neka su na njega milost i spas od našeg Gospodara, sve dok zvijezde budu sijale na nebu, i neka su salavat i selam na sve članove njegove porodice i sve ashabe, sve do dana povratka Njemu.

O postači, bojte se Allaha tokom prekida posta i za vrijeme posta, i budite svjesni Njegovog nadzora u tajnosti i javnosti. "O vjernici, propisuje vam se post kao što je propisan onima prije vas, da biste se grijeha klonili." (El-Bekara, 183)

O postači, prošao je početni dio ovog mjeseca, a nastupio je završni, prošlo je otvaranje, a nastupilo zatvaranje, i vaš gost samo što nije otišao. Iskoristite njegov ostatak prije nego što odu njegovi dani i podignu se njegovi šatori. Gubitnik i nesretnik je onaj koji upropasti blagoslovljeno vrijeme, i ko se nemarno odnosi prema mjesecu berićeta i milosti. Koliki je to samo gubitak i nesreća!

O postači, blago onome ko je pažljivo i s razmišljanjem učio Kur'an! Blago onome ko je udjeljivao siromašnima i opskrbljivao ih onim što im je potrebno! Blago onome ko je postio i ustegnuo se od činjenja zla i uznemiravanja ljudi! Blago onome ko je probdio ramazanske noći u ibadetu, i čuvao svoj post od griješenja! Blago onima koji požuruju s činjenjem dobrih djela, žele dobro, ustrajno ga čine, strahujući da ih ne pretekne smrt.

Allah, džellešanuhu, pohvalio je vjernike i opisao ih najljepšim osobinama, od kojih su žurno činjenje dobrih djela, posvećenost dobru i velika želja za činjenjem dobra. Uzvišeni kaže: "Ali, nisu svi oni isti. Ima ispravnih sljedbenika Knjige koji po svu noć Allahove ajete čitaju i mole se; oni u Allaha i u onaj svijet vjeruju i traže da se





čine dobra djela, a od nevaljalih odvrćaju i jedva čekaju da učine dobročinstvo; – oni su čestiti.” (Ali Imran, 113–114)

Uzvišeni Allah pohvalio je Zekerijjaa, njegovu suprugu i evlad zbog ove osobine, pa je rekao: “Oni su se trudili da što više dobra učine i molili su Nam se u nadi i strahu, i bili su prema Nama ponizni.” (El-Enbija, 90)

Nema ništa ružnije, zbog čega Allah kori čovjeka, od lijenosti u izvršavanju farzova, vadžiba i pobožnih djela, i žurenja u grijeh i zlo. Uzvišeni kaže: “Vidiš mnoge od njih kako u grijeh i nasilje srljaju i kako ono što je zabranjeno jedu; ružno li je to kako postupaju!” (El-Maida, 62)

O ti koji ustrajavaš u grijesima, zar nije došlo vrijeme da se pokaješ?

O ti koji si nemaran prema spominjanju svoga Gospodara, do kada će tvoje srce biti “zastrto”?

O ti koji si nemaran prema Njegovom mjesecu ramazanu, i koji si zauzet zabavom, o ti koji vodiš druge u zabludu, o ti koji se ne odazivaš na poziv dobra, požuri prije nego što ode ovaj veličanstveni mjesec, pohrli svome plemenitom Gospodaru, oslobodi svoju dušu od apatije i oklijevanja, i svoju narav od lijenosti, tromosti i kolebanja, okani se nemara i grijeha, pokaj se za sve svoje grijeh, idi na “vrata pokajanja”, naći ćeš ih otvorena, okreni se Allahu, dok još imaš vremena, i popravi svoje srce i dušu, jer uspio je onaj ko požuri i pokrene se, spasio se onaj koji se trudi i pođe na put noću prije dana, a propao je onaj koji se vraća nazad dok drugi idu naprijed.

Allahov robe, brzo se pokaj za svoje grijeh, boj se svoga nemara, okani se grijeha prije nego što nastupi edžel, Allah će prihvatiti pokajanje onima koji se iskreno pokaju i oprostiti grijeh onima koji zatraže oprost od Njega.

Nalazimo se u zadnjih deset lijepih i čistih noći ramazana. Približila se časna, veličanstvena i svečana noć, Lejletul-kadr, Noć kadera. Potrudi se najviše što možeš, ostavi postelju, okreni svoje lice i srce prema Allahu, ispuni svoj cilj i daj sve od sebe.





Aiša, radijallahu anha, rekla je: "Poslanik, sallallahu alejhi ve sellem, trudio se u zadnjih deset dana ramazana kao što se nije trudio u drugim danima." (Muslim)

Aiša, radijallahu anha, također je rekla: "Kada bi nastupilo zadnjih deset noći ramazana, Allahov Poslanik, sallallahu alejhi ve sellem, pritegao bi svoj ogrtač, provodio bi noći u ibadetu i budio bi svoje ukućane na namaz." (Muttefekun alejhi)

Probijte ove noći u skrušenosti i poniznosti, učite što više istigfar. Vaš Gospodar voli vidjeti Svoga roba skrušenog i poniznog, kako žudi za Njim i Njegovom milosti i traži od Njega oprost od grijeha. Pokažite pokornost, strahopoštovanje i potrebu pred Njim, nadajte se Njegovom dobru i milosti, svojim riječima i djelima.

Koga obaspe milost njegovog Gospodara, postići će sreću na ovom i budućem svijetu.

Allahu moj, probudi nas iz nemara i podari nam uspjeh u mjesecu milosti.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

